



SIARAN AKHBAR

MoU ANTARA SME CORP. MALAYSIA DAN ENTERPRISE SINGAPORE BAKAL DORONG PERTUMBUHAN PMKS

KUALA LUMPUR – YAB Dato' Seri Anwar bin Ibrahim, Perdana Menteri Malaysia dan TYT Lee Hsien Loong, Perdana Menteri Singapura telah menyaksikan majlis pemeteraian Memorandum Persefahaman (MoU) di antara SME Corp. Malaysia dan Enterprise Singapore di The Istana, Singapura pada 30 Oktober 2023 yang merintis jalan ke arah memperkukuh hubungan dua hala dan mendorong pertumbuhan Perusahaan Mikro, Kecil dan Sederhana (PMKS) bagi kedua-dua negara. Majlis tersebut menjadi lebih signifikan kerana diadakan bersempena Lawatan Kerja YAB Perdana Menteri ke sesi Permukiman Pemimpin-pemimpin Malaysia-Singapura yang Ke-10.

MoU yang ditandatangani secara rasmi oleh Encik Rizal bin Nainy, Ketua Pegawai Eksekutif SME Corp. Malaysia, dan Encik Lee Chuan Teck, Ketua Pegawai Eksekutif Enterprise Singapore telah mengukuhkan lagi kerjasama antara kedua-dua organisasi ke arah pembangunan PMKS Malaysia dan Singapura. Kerjasama ini memberikan tumpuan kepada aspek latihan, pendigitalan, kelestarian dan akses pasaran yang lebih luas untuk PMKS kedua-dua negara. SME Corp. Malaysia telah mengenal pasti lapan (8) sektor yang akan diberi keutamaan untuk aktiviti padanan perniagaan termasuk pertanian pintar, elektrik dan elektronik, aeroangkasa, peranti perubatan, industri halal, minyak dan gas, pelancongan dan biomas.

Mengulas mengenai MoU tersebut, Encik Rizal berkata, “Melalui MoU ini, kami berhasrat ianya bakal membawa kepada kerjasama lebih erat serta kemakmuran ekonomi untuk Malaysia dan Singapura, khususnya dalam pembangunan PMKS menerusi perkongsian pengetahuan, pengalaman dan amalan terbaik. Kedua-dua negara amat mengharapkan untuk mengambil peluang daripada potensi sektor PMKS masing-masing dan memanfaatkan kerjasama ini bagi menyokong aspek

keusahawanan, inovasi dan pertumbuhan ekonomi. MoU yang dimeterai ini sememangnya satu peristiwa penting buat kedua-dua negara”.

Pada tahun 2022, Singapura muncul sebagai rakan dagang kedua terbesar Malaysia di peringkat global dan menduduki tangga teratas dalam kalangan negara ASEAN. Jumlah dagangan antara kedua-dua negara mencecah RM368.1 bilion, dengan lebih perdagangan kepada Malaysia. Eksport Malaysia ke Singapura pada 2022 mencecah RM232.56 bilion, manakala import berjumlah RM135.63 bilion. Lebih perdagangan yang besar ini menunjukkan kerjasama ekonomi yang kukuh antara kedua-dua negara.

Trend positif dalam perdagangan Malaysia-Singapura berterusan bagi tempoh Januari - Ogos 2023, dengan nilai dagangan mencecah RM281.9 bilion. Prestasi ini menyerlahkan daya tahan dan dinamik hubungan perdagangan dua hala. Statistik ini menunjukkan komitmen yang jitu terhadap pertumbuhan dan kemakmuran bersama yang menekankan kepentingan perkongsian strategik antara kedua-dua negara.

Hadir sama dalam majlis tersebut adalah YB Datuk Ewon Benedick, Menteri Pembangunan Usahawan dan Koperasi, YBhg. Dato’ Dr. Azfar bin Mohamad Mustafar, Pesuruhjaya Tinggi Malaysia ke Singapura dan Encik Rizal bin Nainy, Ketua Pegawai Eksekutif SME Corp. Malaysia.

– TAMAT –

Tentang SME Corp. Malaysia

SME Corp. Malaysia merupakan sebuah Agensi Penyelaras Pusat di bawah Kementerian Pembangunan Usahawan dan Koperasi (KUSKOP) yang berperanan sebagai pusat pengumpulan dan rujukan setempat bagi maklumat dan khidmat nasihat Perusahaan Kecil dan Sederhana (PKS), penyelaras program pembangunan PKS, penilaian ekonomi serta pengakreditasi PKS, pembangunan perniagaan dan program sokongan, dan juga fasilitasi akses PKS kepada pasaran dalam dan luar negara.

Bermula pada 2 Mei 1996, SME Corp. Malaysia dahulunya dikenali sebagai Perbadanan Pembangunan Industri Kecil dan Sederhana (SMIDEC), bermatlamat membangunkan Industri Kecil dan Sederhana (IKS) Malaysia yang berkeupayaan dan berdaya tahan agar mampu berdaya saing di pasaran global. Pada tahun 2007, SMIDEC telah diberi mandat oleh Majlis Pembangunan PKS Kebangsaan yang dipengerusikan oleh YAB Perdana Menteri untuk menggubal dasar dan strategi menyeluruh bagi PKS dan memacu program PKS merentasi Kementerian dan Agensi. Sehubungan itu, SMIDEC telah dijenamakan semula secara rasmi sebagai SME Corp. Malaysia pada 2 Oktober 2009.

PERBADANAN PERUSAHAAN KECIL DAN SEDERHANA MALAYSIA (SME CORP. MALAYSIA)

Aras 6, Blok B, Platinum Sentral
Jalan Stesen Sentral 2
Kuala Lumpur Sentral
50470 Kuala Lumpur
Tel : 1300-30-6000
Faks : 603-2775 6001
E-mel : info@smecorp.gov.my
Laman sesawang: www.smecorp.gov.my

Pengarah
Bahagian Komunikasi Strategik
(U.P. : Pn. Suraini Mohamad Sulaiman)
Tel : 03-2775 6290
Emel : suraini@smecorp.gov.my